



# Kwakkerte - Kroniek

*Leef Kwakkerte, Kwekerkes en Koeleköp*

*VV de Kwakkert veertj aankomendj vastelaovessezoen zien 5 x 11 jaorig bestaon. Eine mijlpaol woeë wae gaer effe bie stil wille staon.*

*De aankomendje waeke kintj gae in 't Heitser Blaedje eine trökblik op 55 jaor vastelaovendj verwachte, de Kwakkerte-Kroniek.*

## Äöver vreuger ....., de Vorst

Eder jaor haet de vastelaovesvereniging eine angere Prins, degene dae inne belangstelling steit, woeë 't allemaol óm dreitj. En naeve dae Prins löptj altied eine Vorst, dae op 'm létj wie eine merrie op zien väöle. De Vorst, kertrekker en belangriekste pieler inne vastelaovesvereniging.

Väör "Äöver vreuger ....." bezeuke wae de langst regerendje Vorst, Groeët-Vorst Sef I en zien vrouw Yvonne.

Groeët-Vorst Sef I waerdje in 1959 gevraagdj óm ein jaorke mèt te helpe bie VV de Kwakkert. Wie 't zoeë-dök geit waerdje det oeteindelik hieël väöl jaore, in 1966 waerdje hae Vorst en pas in 1993 gaaf hae de scepter äöver aan ziene opvolger, Aod-Vorst Sjang I.

In de beginjaore waas VV de Kwakkert nog klein, mèt eine Raod van minder dan elf man. Mer de saamhorigheid waas groeët, en volges Sef anges den in deze tied.



Alle vastelaovesjaore wore volges Groeët-Vorst Sef I aeve bezunjer. Mer trökkiekendj waas 1974 missjien waal 't meist oetzunjerlikke; hektische. Det waas 't jaor woeë-in 't ieërste BCL treffe waerdje georganiseerdj door VV de Kwakkert. In det jaor waas Ton I Dings vastelaovesprins en zoot hae in deenst. En hae kreeg gein verlof väör det BCL treffe. 't Haet väöl gesmeek en lang kalle bie de kommandant gekosj óm Ton vrie te kriege. Mèt succes trouwes.

Detzelfdje BCL waerdje georganiseerdj in de op det moment nog in aanbouw zeendje sport-hal. Sef is Huub Schroen en zien minse nog steeds erkentelik väör alle steun en inspanning

die geleverdj is óm dae bouw bietieds vaerdig te höbbe.

't Waas good zitte bie Sef en Yvonne, ze haje mieër te vertèlle den wae in 10 Kwakkerte-kronieke bie-ein kinne sjriev. En asse oeteindelik klaor steis óm heivers te gaon den zuus se det Kwakkerte-hert; ein verzameling Kwakkerte beeldjes, zoeë-väöl, det wils se neet weite.

Waertj vervolgdj